



**Messi Argentina team nungi
ano khen asayatsü**

**Iran rara tembangtsü atema House
nung asemben huba vote agitep**



VOL. XXIII ISSUE NO. 337 (ADOK 337) DIMAPUR YANGTEPNÜ (THURSDAY) RONGJUI (SEPTEMBER) 17, 2026 ₹ 5.00

LMCP-i 'Safe products, Confident consumer' sentong agi

Kohima, September 16, 2026

(TYO): Department of Legal Metrology & Consumer Protection (LMCP) Kohima-i Nagaland State Legal Services Authority (NSLSA) aser Economics & Political Science department, KROSS College Kohima den yaritepa "Safe Products, Confident consumer" omen nung ajemdaker consumer awareness programme ka agiogo.

Iba sentong ya Kevi Hall, KROS College, Kohima nung agi aser tongti o jembirji NSLSA member secretary Neiko Akami liasü.

Consumers taginübatem kümzüka ayutsü, mapang shitak nung ketdangpurtem tentettsü aser consumers' ken o tem angatetteptsü atema Act tasen ka ama Consumer Protection Act 2019 (No 35 of 2029) tenzükogo ta Neiko Akami-i ashi.

Iba Act ajanga unfair trade practices, defective goods, deficient services aser tanga exploitative practices nungi consumers kümzüka ayutsü ta pai ashi.

Consumer kati trader mesüra service provider mashii kati unfair trade practice mesüra restrictive trade practices anema ken o benoktsü akok ta Akami-isa ashi.

Department of Legal Metrology & Consumer Protection nung Joint Controller Shiloh Kath-ia o jembidang department ya pro-consumer ama inyaker aser consumers ajak

kümzüka ayur ta ashi.

Act- 2009 aser Rules 2011 (2006 Jan Vishwa Amendment Rules) ama legal metrology laws ajanga department-i consumers kümzüka ayutsü atema weight and measure jangjashir ta pai ashi.

"Onokisa Package Commodities Rules, 2011 mapa inyaker aser iba nung weight, volume, aser manufactures, importers, packers, number aser address aser MPRs amala repranger" ta Kath-i ashi.

Joint Controller Kath-isa kaketshirtem dang taila websites, ashikülak calls aser message, tim masüba online services, counterfeit products, images and videos yanglushiba aser digital frauds balala nungi jembua alitsü ayongzük.

"Department-i shisaliok reju balala nung consumer awareness programme agia arur aser iba ya kaketshirtemi pei temeten meteta lidaktsütsü atema lir" ta Assistant Controller (HQ), Department of Legal Metrology & Consumer Protection Shiekhozo-ia ashi.

"Kodang nenoki temetentem meteta lidir, service providers aser manufacturing units ajanga nenok mashioktetttsü aser nenok nem good service & products agütsütsü" ta paisa ashi.

Paisa kaketshirtem dang smart consumer akümtsü aser timtem ajurudang department dang nungi teyari agitsü aser tim masüba angudang osang sangoktsütsü ayongzük.

Power Department-i electricity bills talila adokba reprangshir

Kohima, September 16, 2026

(TYO): Nagaland Power Department-i electricity bills tali aruba khuret angadangtsü tenzükogo. Smart meters enokba sülen electricity bills talila adoker ta consumers-i ken o tem benoka lir.

"Department nung nübo peria maliba ajanga regular meter reading kanga tasak kümogo. Nagaland nung registered electricity consumers lakh 3.5 lakh shi lir saka meter readers 300 shi dang lir" ta Chief Engineer (Distribution and Revenue) R. Lobosang Jamir-i ashi.

Meters mazüngba consumers dang tesüiba ita asem average consumption nung ajemdakersa bill agütsür. Kodang actual reading agidir idangji single bill ka nung accumulated consumption sayur

ta pai ashi.

Tang tashi nung department-i smart meters 50,000 jungnüa enokogo aser iba ya talisa Dimapur, Chümoukedima aser Kohima nung lir. Item smart meters ajanga SIM-based communication amshir aser ita tembang shia consumption data agütsür.

Smart meters amshiba consumers-i manually readings agütsütsü nüngdak madoker. Billing nung tim masüba lir ta temulung melemi bilemertemi pei pei subdivision ketdangsürtem den ajurutepa jangiateptsü akok ta Er. Jamir-i ashi.

Kodang meter mesüra departmental aibelen kuli ngutetdir, bill metongshitsü akok aser meter melener. Consumers-i smart meter den külemi check meter ayutsü

akok ta paisa ashi.

Ano bill aika adoker khen nung magütsüteba kibongtemi instalment asem lemsar agütsütsü akok ta paisa shisem.

Domestic consumers-i rooftop solar amshitsü ayongzük aser iba atema 3 kW tashi government subsidies lir. Iba maparen atema department-i vendors 26 empanelled süa lir ta Er. Jamir-isa ashi.

Metering aser revenue collection tajungba akümba ajanga Nagaland nung power infrastructure tajungba akümtsü aser central government schemes asoshi lenmang lapoktsü. Department-isa colony balala nung smart meters tebilemtsü angadanga bentettsü atema sensitisation programmes agir ta Er. Lobosang Jamir-isa ashi.

Dr SC Jamir-i Naga tebilemtsü jembitsü tashi mali: NSCN-IM

Dimapur, September 16, 2026

(TYO): Taoba Nagaland Chief Minister Dr. S.C. Jamir-i Naga yimten tebilemtsü atema jembitsü tashi mali aser pai party tenüng nung dang jembir ta NSCN-IM-i ashi.

Nagaland sorkar indang Political Affairs Committee (PAC) senden nung adenba sülen NSCN (IM) Deputy Ato Kilonser VS Atem-i osangbener

dang tawa SC Jamir-i Naga yimten tebilemtsü indang jembiba atema kecha mashitsü ta ashi

"Onoki kecha mashitsü. Parnok ya tashi agütsüba, shimtetba nisungtem masü. Parnoki party tenüng nung dang jembir" ta Atem-i ashi.

"Jamir ya Naga nunger atema advocate masü. Onoki ibaji tetenzük nungi meteta

dang liasü aser pai Naga yimten tebilemtsü atema jembitsü temeten mali. Naga yimten latettsüba ya New Delhi dak dang keta lir" ta NSCN (IM) tanishir Rh. Raising-ia ashi.

"Tanü PAC senden nung olemtep atsülangba indang jembi aser jembishinüa aotsü atema apex committee ka tentettsü tebilemba lemsatepogo" ta Chief Minister Neiphiu Rio-ia ashi.

"Time Travel to Nagaland, 1979" photography exhibition tenzükogo

Dimapur, September 16

(TYO): Japan nunger ethnographic photographer Yuzo Morita-i 1979 küm Nagaland semdangba mapang document asüba Nagaland sobaliba senmang aser takum yimyatem sayutsü atema "Time Travel to Nagaland, 1979: A Japanese Photographer's Record of Life and Tradition" photography exhibition tenzükaga agir.

September 16, 2026 nü Museum Annexe Courtyard, Directorate of Art & Culture, Kohima nung iba exhibition tenzükogo.

Iba sentong ya National Museum of Ethnology (NMoE), Osaka, Japan den longjemer ayongzük aser NMoE nung yua aliba Database of Naga Collection aser Digital Archives of Morita's Photography Collection sayur.

Iba sentong nung tetushi süa jaoker Art & Culture and Treasuries & Accounts Advisor K. Konngam Konyak-i o jembidang "iba exhibition ajanga Japan nunger ethnographic photographer Yuzo Morita-i 1979 küm State tesem balala sema



senzüdang tangokba noksatem ajanga tesüiba mapang Nagaland meyipa reprangtsü maongka agütsür" ta ashi.

Noksatem ya Nagaland nung küm 40 shi tejakdang nüburtem, sobaliba, anogoshi taküm yimya aser alinük indang lir. Iba ya Nagaland asoshi jenjang tulu aketba aser senti records lir, ta pai ashi.

Nagaland State Museum, Department of Art & Culture aser National Museum of Ethnology (NMoE), Osaka, Japan tsüngda tesendaktep tali

akangshiogo aser iba ya sobaliba, research, documentation aser shisatsü lemsatpba nung maongka agütsür, ta Advisor Konngam-isa ashi.

Commissioner & Secretary, Art & Culture, Bodeno S. Colo, NCS ajanga pela agizükba o jembidang iba exhibition ya kanga tongtipang lir, kechiaser iba ya ajanga Nagaland tongtipang putiotsü atalokba mapang Morita-i noksa tangoka bendenba sayur, ta ashi.

Item noksatem ya tenük agi

angutsü record jenjang tulu aketbatem lir, koba ajanga tanü putu aser tesüiba putu sendakteper ta lai ashi.

Iba ya NMoE, Osaka aser Nagaland State Museum tsüngda August 5, 2025 nü Statement of Cooperation sign asüba ajanga inyakba mapa ka lir, ta Bodeno-isa ashi.

Iba sentong nung Director, Art & Culture, Adela Moa-ia NMoE, Osaka den tesentakp aliba indang tatsüka lemsatp.

Japanese museum nungi

teshimtet nübotem den ajurutepa sensaksemba ajanga Naga culture, exhibitions, documentation aser academic research tenzükogo ta Adela-isa ashi.

Department kedtangsürtemi NMoE, Osaka semdang aser artefacts jangiatepa liasü aser Naga collection database renemba nung shilem agi. Iba maparen ya ita trok shi inyaka aruogo ta laisa ashi.

Associate Professor, NMoE, Osaka, Japan, Emi Okad-ia o jembidang lai 2012 nung mezüng atema Nagaland semdangdang sobaliba ken atenba aser kentenba khenyongi balaka angudang kanga puadaktsü ta ashi.

NMoE nung Naga nunger dak sendakba artefacts 250 shi lir aser reju anati Naga collection atema research, exhibitions aser documentation maparen inyaka arur ta lai ashi.

Morita-i 1979 nung Nagaland semdangdang tangokba noksatem digitized süogo aser digital archive tasen ka ajanga angutsü. Iba exhibition ajanga 1979 küm Nagaland nung sobaliba takar meyipa reprangtetttsü ta Okad-isa ashi.

Dimapur nung District Level Youth Festival 2026 mungogo



MDSC Indoor Hall, Dimapur nung September 16, 2026 nü District Level Youth Festival 2026 ayongzükba sentong nung DYRSO, Wutsutho aser shilem agirtem külemi tangokba noksa ka yangi angur.

Dimapur, Rongjui/Sept. 16 (TYO): District Youth Resources and Sports Office (DYRSO), Dimapur ajanga MDSC Indoor Hall, Dimapur nung September 16, 2026 nü District Level Youth Festival 2026 ayongzükogo.

Iba benjong ya ajanga lanurtem nem sobaliba ken, sobaliba tsüngsang aser declamation nung toktepa pei sempet aser sobaliba skills sayutsü maongka agütsü. Iba benjong nung telok ti-i shilem agia liasü.

District Youth Resources and Sports Officer (DYRSO), Wutsutho-i shilem agirtem pela agizükba o jembidang, District

Youth Festival ya tetoktepa kisüng masü saka lanurtem tasü aittsü, telungjem adokdaksütsü aser saisaponger tanüla adokdaksütsü atema maongka lir, ta ashi.

Pai shilem agirtem dang tajungtiba nung tokteptsü, külem tetokteper tem akumtsübotsü aser külemi inyaksü ajungshia liasü.

Wutsutho-i ketdangsur, tetendanger, tesayur, staff aser iba sentong takok angutsü asoshi shilem agir ajunga dang pelaba lemsatep. Paisa district level nung takok angurtem ya state level tokteptsü asoshi shimtsü, kong districts 17 nungi tajungtiba teams ti kisüng shimtsü ta metetdaksü.

Pai shilem agirtem dang iba sülen selection process atema junga renema alitsü ayongzükba liasü.

Sobaliba tsüngsang nung KSUDC-i mezüngbuba aser SSUDC-i tanabuba jenjang nguteta liasü.

Sobaliba ken toktepa nung Aotsür temi mezüng jenjang aser Kentener Cultural Club-i tanabuba jenjang ngua liasü.

Declamationnung Hetisa T. Sangtam-i mezüngbuba jenjang aser Achunjanger Aier-i tanabuba jenjang ngua liasü.

Sentong tembanga sempet lema agütsü aser Wutsutho, DYRSO-i melepzüng o jembia liasü.

Medziphema nung ODOP indang workshop ayongzük

Dimapur, Rongjui/Sept. 16 (TYO): District Industries Centre (DIC) Dimapur, Department of Industries & Commerce Government of Nagaland ajanga September 16, 2026 nü City Centre Medziphema, Chümoukedima nung One District One Product (ODOP) indang capacity building workshop ka ayongzükba liasü.

General Manager, DIC Dimapur, Chikutoh Nyusou-i iba sentong ayongzükba nükjidong lemsatepba mapang, entrepreneurship aser MSME terenlok atema workshop nungdakba aser ODOP nükjidong tongmelang agi rateta ashi.

Pai Medziphema nung jeru lu ayimtsü tongtipang lir ta ashi aser jeru ya horticulture crop tongtipang ka aser aluyimer aika asoshi rongsen aruba lenmang tajungka lir ta ashi.

Pai jeru lu ayimba nung scientific yimya amshitsü, post-harvest management, ayokba nung akoksaba ajemdaksütsü

aser aroki shilem agitsü indang jembia liasü.

Jeru lu ayimer nem shisatsü aser practical skills agütsütsü aser ODOP kübok maongka balala aliba awareness agütsütsü nükjidong nung iba workshop ya ayongzük, ta pai ashi.

Pai ano jeru lu ayimertem dang workshop nung shilem tajung agitsü aser jeru lu ayimba ya aluyimer ajunga asoshi tajangzük anguba source ka kumdaksütsü asoshi külemi inyaksü ayongzükba liasü.

Technical expert den sensaksemba mapang Zakietsono Jamir, Founder, Coffee Lady ajanga lai ajangshiba tem lemsatepa liasü.

Lai iba mapang business ajungtsü atema coffee indang quality angatetsü nungdakba, shidak processing packaging aser branding asütsü nungdakba indang rateta ashi. Asen aliba tesem nung alu nungi adokba rongsen tem shishilempadak yoktetsüsa oset tajung kuma

melendaksütsüla, aser ibaji ajanga senotsü talu angutsü aser employment maongka angutsü, ta ashi.

Iba workshop nungya ODOP inyakyim indang session ka agi aser iba sülen Kiyelu T Yephtho-i Pineapple processing: Value Addition and Enterprise Development indang presentation ka agüja liasü.

Iba sentong ya Make in Nagaland Financial Analyst, RAMP kübok ayongzük, kong Digital Business Development, Operational Management for Business Success onüktema amshia liasü.

Sentong tembanga Jethro Mesen Functional Manager, DIC Dimapur ajanga melepzüng o jembia, kong Razaphema, Molovom, Maova, Medziphema, Zhuikhu, Bungsang, Socunoma aser Tsiepama yimtsüngtem nungi jeru lu ayimer 78 dena liasü.

Sentong nung Lika, Project Associate RAMP menden liasü aser Pikali Zhimo-i RAMP Nagaland indang rateta ashi.



Mon district nung nüburtem dang temeim sayua Class of Music ajanga Quantum Production aser The Modern Box den lungjemer TaFMA Mokokchung teyari nung charity concert tilaka Imkongmeren Sports Complex nung September 15, 2026 nü ayongzükba liasü. Iba sentong nung Class of Music school nung azüngertem, Desvelado, Wapang and the Band, Empty Pockets aser Gluttons nungia shilem agia liasü. Noksa nung iba concert ayonger den Deputy Commissioner, Mokokchung, Ajit Kumar Verma; ADC Mokokchung, Atsungba Walling aser Konyak Union Mokokchung nungi ketdangsurtem angu. Iba concert nung sen 100,000 bendenteta Mon nung lendong timtem ajurur alirtem dangi yokogo.

Kohima nung Language Proficiency Certificate atema metetdaksür

Dimapur, Rongjui/Sept. 16 (TYO): Nagaland sorkari jangjateta aliba oshi 19 (local languages/dialects) atema Language Proficiency Certificate aginer temi agütsütsü documents indang 'mandatory checklist' asoshi Deputy Commissioner, Kohima indang office ajanga metetdaksügo.

Iba sangdong ya Home Department (Home Branch) ajanga State nung jembiba oshi 19 jangjatea aliba dak sendakba nung metetdakja aliba indang alitsü.

Language Proficiency Certificate aginer applicants

temi plain paper nung application den pei Scheduled Tribe (ST) Certificate, Indigenous Inhabitant Certificate (IIC), Class 10 (HSLC) marksheet aser pei Tribal Literature Board/Ura Academy nungi recommendation letter ka dener agütsütsüla. Iba den ano verification atema applicants temi tanga nungdakba documents tema agütsütsütsü.

Language Proficiency Certificate ya Additional Deputy Commissioner, Kohima ajanga agütsü, ta sangdong ajangasa ashi.

Mokokchung nung angu taküm ayokdak lapokogo



Osail Mart, angu taküm ayokdak MCCI Tir Wb. Tsükti Lkr-i (abelen nungi asemububa) lapoktsür kelen kibur Wb. Opangrenba (abelen nungi pezububa) MCCI pur aser Osail Mark nung inyaktertem külemi tangokba noksa.

Mokokchung, Rongjui/September 16 (TYO):

Mokokchung shishilembaba nung renloka aotsü asoshi nüburtemi tali Khensa, Ungma aser Chuchuyimpang lushi shishilembaba maparen inyaksü kanga dang nungtaker, aser ibaji inyaktetra Mokokchung shishilembaba renloktetsü teimla tulu lirta tanü Mokokchung Chamber of Commerce & Industry President Wb. Tsükti Lkr-I angu taküm ayokdak "Osail Mart" lapokba sentong nung tetushi tejaoker o jembidang ashi.

Mokokchung nung shishilembaba tsütsülen meilongi renloka aoba mapang ka nung Mokokchung nübur nungtakba angateta iba angu taküm ayoktsü aser mapatong tasen ka tenzükteta Mokokchung shishilembaba renlokdaksüba nung shilem tulu agitetba asoshi Osail Mart kibur dang pelaba Mokokchung nübur tenüng nung metetdaksü.

Mokokchung town baazar nung nübur nungtakba ajak angur, ano tanga town dang nungi Mokokchung nung anguba jenjangsa talangba kümogo, aikati Dimapur penzüir saka Mokokchung-i Zünheboto aser Wokha district ana tesadangbo peritsür aser talisa Tuensang, Longleng, Noklak

Shamator aser Kiphire nungerbo ajak Mokokchung nungi abener ta MCCI Tir-isa lemsatep.

Sentong nungsa Osail Mart kibur Wb. Opangrenba-i jembidang Mokokchung nübur tenzütsü asoshi iba mapatong ya tenzüker, kechiaser iba Osail Mart nungi angu taküm ayoktsü, Mokokchung town tiyong nunga angu takumji ayoktsü saka ano tongtipangsa baazar-i marutetertemi aser nungdakbapurtemi Osail Mart den tongtepratepra pei-i aginüba angoji ki tonga bener arutsütsüta metetdakja ashi.

Osail Mart shishidak meshiteta Mongoya Prayer Garden Pastor Rev. S. Toshi-i sarasadem aser Sb. Yangertemjen ketdangsuba nung sentong aniba den ano Chuchuyimpang Baptist Arogo Pastor Wb. Limasangwa ajanga sentong nung Tsüngrem lenisüba jazüka sarasadem aser tatemsa Police Baptist Church Mokokchung Pastor Wb. L. Temjen jamir-i tenüngsang agüja sarasadema sentong tembanga liasü.

Osail Mart, Angu taküm ayokdak ya Chuchuyimpang nung lushi nung DEF Mokokchung tenla ki anasa lapoka lir aser ano pei ki tonga bener arudaksünertemi 9612036551 nung tongteprateptsü akok.



September 16, 2026 nü US nung Indian Union Minister for Power, Manohar Lal G20 Energy Ministers' senden nung adenba noksa nung angur.

2013 kum ken o ka nung aitsur ajak nem tasuba temerenshi agütsütsü

New Delhi, September 16 (Agencies): 2013 kum Chhattisgarh kubok Bastar district nung Maoists telungpurtemi Jhiram Ghati amakba ken o dak sendakba nung aija alir nisung 10 nem tasuba temerenshi obendang agütsüogo.

Bodhbarnü special National Investigation Agency (NIA) court-i iba obendang agütsü.

2013 kum May 25 nü Maoists telungpurtemi Jhiram valley nung aliba national highway nung Congress party lenirtem convoy amakba

mapang nung nisung 29 asü. Asürtem rongnung security sepaitem, tali maket nisungtem aser yimtenren lenir kar densema liasü.

Asürtem rongnung taoba mapang Chhattisgarh Congress party Tir Nand Kumar Patel, par jabaso Dinesh Patel, taoba mapang opposition lenir Mahendra Karma, taoba mapang Union minister Vidya Charan Shukla aser taoba mapang MLA, Uday Mudliyar nung densema liasü.

Jagdulpur nung special NIA court nung Special Judge Abhay Singh Rajput-i kuli

agütsür 101 kuli angadanga sülen tetsür ana densema nisung 10 aija liasü.

NIA court-i iba obendang agütsüba sülen taoba mapang Chhattisgarh nung chief minister Bhupesh Baghel-ibo, state nung SIT-i iba ken o ya bushisüngdanga ibaji ajanga iba asalentong yanglusangji tejangja metettsü, ta ashi.

Ano taoba mapang chief minister aser BJP lenir Raman Singh-ibo, iba tatalokba dak sendakba nung opposition party temi politics asayar aser judicial telemtetbaji süoki ia magir, ta metetdaksü.

Pakistan nunger navy rong aser Indian navy rong na tsüktep

New Delhi, Rongjui/ September 16 (Agencies): International tzüym nung Pakistan nunger navy rong aser India nunger navy rong na tsüktepba sülen India-i Pakistan nunger ketdangser jaoka liasü.

Küm 15 tejaklena Gulf of Aden nung India nunger rong aser Pakistan nunger rong na tsüktepa liasü.

MEA-i sangdong ka ajanga, Pakistan nunger naval units aibelen ajanga rong ana tsüktepbaji magizükteter, ta metetdaksü.

Yaküm Operation Sindoor sülen India aser Pakistan na tsüingda tesendaktep kanga mejungi kümer aliba mapang ka nung rong ana tsükteper.

September 15 aonung North Arabian Sea nung India nunger raraba rong 'Kolkata-class destroyer' aser Pakistan nunger PNS Hunain na tsüktep. India nunger rongji Operation Urja Suraksha kubok surveillance mission senzüdang aser Pakistan nunger rongji Sea Spark exercise dak sendakba nung Arabian Sea nung senzüdang tsüktep.

Osang angazükba agi, Channel 16 ajanga tekümdangtsü osang aiben tuyu.

metetdaksür liasü, ajisüaka Pakistan nunger rongji ajungbena kanga kera aruba sülen India nunger navy rong dakji tiplen tsükoktsü.

Ajisüaka India nunger rongji kecha meraksa aser rong nung alirtema shinga meyirur.

PNS Hunain rong ya 2024 kum July ita nung commission süa liasü.

India-i, Pakistan nunger rong jagi 1991 kum linük ana tsüingda tezüngzüktep agia aliba kubok Arrla 10 anema inyakogo, ta metetdaksü.

Iba tezüngzüktep kubok International tzüym nung India nunger navy rong aser Pakistan nunger navy rong naji ishiba agia nautical mile 3 (kilometer 5.6) bo pilar alitsüla.

MEA sangdong ajanga, "Pakistan nunger ketdangser jaoka pa dang tim ketdangsertem dang military units ajak kümdanga alitsü aser tarutsü nungbo item ama tatalokba nokdangtsü atema tezüngzüktep shidak bentshitsu metetdaksüogo," ta metetdaksü.

India-i Pakistan ketdangser dang ibaji Pakistan foreign ministry nem metetdakja, ta tuyu.

Centre-i Shahzad Bhatti Network ya kiralongrar organisation ta sangdonger

New Delhi, September 16 (Agencies): Bodhbarnü Union Home Minister Amit Shah-i, Centre-i Pakistan nung amenoka aliba Shahzad Bhatti Network (SBN) telok ya Unlawful Activities (Prevention) Act (UAPA) kubok 'kiralongrar organization ka' ta sangdongogo, ta metetdaksü.

Paisa, Ato kilonser Narendra Modi-i kiralongra khenyongi magizüktettsü mangdang yua aliba dak sendakba nung onoki iba telemtetba ya agiogo, ta metetdaksü.

Shah-i X ajanga, "Iba telok yagi prangpong, bomb aser temesepba mozü arrtsü adena shibelener aser ozüng alema inyakertem nem kiralongra nung shilem agidaktsür. India nunger democratic rejutem anema inyakba aser tesünap

raksatsüba nung parnoki shilem agir aser digital ajanga tesempa proker," ta metetdaksü.

Bodhbarnü Union Home Ministry-i UAPA kubok Arrla 35(1)(a) nung ajemdaker "Shahzad Bhatti Network (SBN)" ya iba Act kubok First Schedule nung züngokogo.

SBN-i kiralongra nung shilem agiba aser India nung kiralongraba aika nung shilem agiba nung ajemdaker sorkari iba telemtetba agi, ta Home Ministry-i metetdaksü.

"Shahzad Bhatti Network (SBN)" ya, melamela mesüdakdaksüba lanurtem aser ozüng alema inyakertem anioka raraba hadir, bomb aser temesepba mozü arrtsü adena shibelendaksüba

organization ka lir. Iba ya India nunger democratic system, tesünap aser linük security atema amokmeren tuluka lir," ta Home Ministry sangdong nung shia lir.

UAPA, Bharatiya Nyaya Sanhita, Arms Act, Explosives Act, Information Technology Act aser Prevention of Defacement of Property Act kubok SBN züngsemtem anema ken o aika benoka lir, ta kasa sangdong ajanga metetdaksü.

Ita ka shi tejaklen SBN network raksatsütsü aser Independence Day jakdang kiralongrartem asalentong nokdangtsü atema state 14 nung parnok anema mita oa liasü. Iba operation mapang nung nisung 253 apu liasü aser SBN züngsemtem anema FIR 80 dak tali benoka liasü.



September 16, 2026 nü Thiruvananthapuram nung Keralam Chief Minister, VD Satheesan (abelen) aser state Cabinet Minister PK Kunhalikutty na 'Reimagining Kerala' tetenzük sentong nung adendang tangokba noksa nung angur.

National Financial Reporting Authority
7th- 8th Floor, Hindustan Times House
18-20 K.G. Marg, New Delhi-110001

NFRA, September 03, 2026 anogo nung Vacancy Circulars ajanga All India mesüra Central Civil Services nungi officers/ State Government & Union Territory Governments officers/ RBI/ Public Sector Banks/ Government Financial Institutions/ Regulatory Bodies/Public Sector Undertakings/Autonomous aser Statutory Bodies/tanga Government Institutions nungi NFRA nung item post atema officers dang nungi application meshir:

(i) Executive Director	- 02 posts
(ii) Chief General Manager	- 01 post
(iii) General Manager	- 03 posts
(iv) Deputy General Manager	- 01 post
(v) Assistant General Manager	- 01 post
(vi) Assistant Manager	- 02 posts
(vii) Personal or General Assistant (Grade-III)	- 04 posts
(viii) Personal or General Assistant (Grade-II)	- 03 posts
(ix) Personal or General Assistant (Grade-1)	- 03 posts
(x) Senior Private Secretary	- 03 posts
(xi) Private Secretary	- 01 post

Deputation nung/ short-term contract basis nung, iba website nung osang tejangja agüja aliba ama asütsü: www.nfra.gov.in.
Tejangrar aser temsüa aliba officers-i agüja aliba format nung tim channel ajanga iba osang ya osangkaket nung sangdong agütsüba sülen anogo 45 matongdangsa application agütsütsüla.
CBC : 07122/11/0003/2627

Bank of Baroda

Regional Office, Jorhat, Crystal Enclave, Seuni Ali, Borpool, A T Road, Jorhat-785001 (Assam)

ADVERTISEMENT
CONTRACTUAL BASIS NUNG FINANCIAL LITERACY COUNSELLORS SHIMTSÜ

Government of India Enterprise ka, Bank of Baroda-i tejangrar candidates dang nungi OFFLINE applications meshir, candidates ji ex-banker(officer cadre) ka asütsüla aser nationalized Bank / RRB / Pvt. Bank nung ishiba agia kum 5 experience asütsüla MESÜRA Business correspondent/BC Coordinator nung ishiba agia kum 5 experience asütsüla MESÜRA Ex RSETI Director ishiba agia kum 3 experience/Faculty ishiba agia kum 5 experience MESÜRA banking nung ishiba agia kum 5 experience / fields dak sendakba, NBFCs/Fis etc. aser application agütsüba mapang nung arshi kum 64 dak tali masütsüla, iba ya Nagaland nung Chumukedima Centre nung contract basis nung Financial Literacy Counsellor shimtsü atema lir, talisa kasa district nungi nübo aginer.

Osang tejangja atema onok indang Bank web site:www.bankofbaroda.com nung reprangang.
Offline ajanga application agizütsü tatembangbuba anogoji:
30.09.2026
Temetettsü: 2026 September 30 anogo tashi nung application hard copy jagi onok indang Regional Office Jorhat atongtsüla, aser iba address nung agütsütsüla- Regional Manager, Regional Office Jorhat, Crystal Enclave, Seuni Ali Borpool, A T Road Jorhat -785001 (Assam).

Date: 17-09-2026
Place: Jorhat



TIR YIMYIM YIMOBILEM (EDITORIAL)

DIMAPUR THURSDAY, SEPTEMBER (RONGJUI) 17, 2026

Naga nunger asoshi mapang malia !

Naga yimten nüchiso bushia-bushia telatetba tajung kati arutsü melen telokang aika kümogo, aji Naga nunger ajak asoshi tebilemtsü tulu, kechiyong telok aika akümba jagi Naga yimten nüchiso angutsüba teimla agütsür masü saka teimla malia ta sayur. Ajisüaka, ano iba dang nung jagi tebilemtsü tulubaji item telok shia nung lenirtem taküm arishi repringdangra ajak kanga tain aser tamburtem dang lir, anungji nisunger tsütsü bilemtsü agibo parnok aika mapang tatsüka tsüngda nung alima nungi pilaa oa adoktsü. Atangji, parnok rongnung karbo taküm liaka mali den kasa, joko, tokoloki mapa meinyaker aser temulungjangi mebilemteter ta kümogo. Iba tensa tiaji kodang bilemdangdir, Naga nunger yimten nüchiso bushirtem ya India government-i lemozüksüba 'Camp' nung anisüngzüka kazütsüba mapang masü saka Naga yimten telatetba kati arutettsüsa aritepa inyaksüba mapang lir. Aji oda, asenoki jungjunga bilemdangra, tang India den yimjung yanglur Naga yimten nüchiso bushir telok shia alitsü asoshi India government-i lateta yutsüba 'Ceasefire Designated Camp' nung aliba ya o tajung jembia ajak külemi 'jail' nung puoka yutsüba amai lir. Joko, asenok item Camp nung lia lia Naga yimten nüchiso asoshi jembitsüba toa amadoker, Naga yimten khuret dang nungibo pei taküm kibong khuretang tuluba kümadokogo. Aji oda, külen asenoki joko Naga yimten nüchiso asoshi timtem arema raratsüa maremtsü aser pei taküm bendanga agüja pei tetsü tasoli yimten nüchiso asoshi, akhidang ama, menokdaktettsü. Tanü asenok Naga yimten tensa tia ya bilemdangra, asenok tsürabur shin o nung ashi ama, Pubo putsü, süngbo süngpet süng aser anübo talur ta asüba amato lir. Joko, Naga yimten nüchiso bushiba tenüng nung telok aika lemsa dang ashi, lenirtem rongnung pi bang koka jembir mali kümogo aser Naga yimten ken o dak aketba onüktem latettsübo tasakba akümer aser lenirtem ajak amato tain kümer leper kumbang nokdaka lir. Iba tensa tia ya asenoki angatetra, tang asenok kati ka aitsütepa dang aliba yimya ya anentsü aser kati ka den aremzüktepa tangatettep kati arutsü merangtsü. Asenoki asen tai mangu tangar dang aitsür dang ashi, Naga yimten tebilemtsü melatetteti tang tashi kangshiba timtem ya asenok dak lir, anungji asenok rongnung telok aika lemsar liaka, tangatetba ka dang süra, iba jagi India den Naga yimten ken o takok ngua jembitettsü. Ashiko, nisung karibo Naga yimten telemtetba kati marutetba ya-ang tajungba aser tajanzük tuluba ta bilema alitsüa akok saka iba tangatetba jagi asüng lendongi anitsü. Asüng, tang Naga yimten nüchiso bushir telok nung alir lenir tamburtem ya alima nungi ka khen, ka khen ta pilaa aotsü aser parnok sülen anidaker lanurtem nem India den Naga yimen ken o jembia latettsüba khuret toktsütsü. Ajisüaka, Naga yimten nüchiso bushir teloktem nung alir tanuburtemibo manganütsüa akok saka Naga yimten nüchiso asoshi raratsüba khuret parnoki makoktsü aser Naga yimten jenjang tasen ka latettsüba shisatsü agi matongtsü. Idangji, ashiko, parnok rongnung mangatettepang tulu adoka ano Naga yimten nüchiso bushir telokang teimba kümadoktsü. Idangjibo, telok karbo teka mekanger temai adokadoktsü. Aji oda, tanü putu ya yashi putu amato masü, joko alima nung nüchiso bushirtem arem nisung kümer raraba putu masü, saka koba kin aser koba telok südir süaka ka küma lungjemer yimti nung adenshia ola adoker aser tema nung lia yimten sabang nung tejembitsü purtem den yimten ken o benoka jembir. Iba tangatetba nung, joko Naga nungertema India government-i lemozüksüba Camp nung lia kati ka aitsütepa amungtsübaaji aaka bilemtsüla aser tang taküm alir tamburtemia tanü putu den apet Naga yimten lateta toktsütsü merangtsüla. Iba amaji ka meinyaktetra, ashiko, tang yimten nung tamburtem ya süadokerbo Naga yimten nüchiso ken o a süa adoktsüa akok.

OLEMSABANG

ASEN AOR TANGATETBA TEMESÜ MASÜ TESADEM ASÜTSÜLA

~ L. Kika Pongener

(Yashi adok nungi...)


Ni aibelener ka mesura; Mangkolemba Full Fledged District akümtsü takhangba agütsüba sulen meshirtem tangarbo District ana-asem küma aoba ngua aruogo. Aser District karbo nubur-ibo takhangba magütsü aser memeshi sernung sorkari odang agütsüba-a angazüka aruogo. Asen Aor asen o asen na shisa-opang ka masüba agi tanü tashi nukjidong mataloker asü (?)....ta nemjema bilemer. Tang Ao lima nung District ka aliba agi District ana (2) küma lemdangba jagi; asen Aor tsüngda nung telemsa kecha madoktsü ta asen Aor ajaki angatettsüla. Tang Mokokchung District-ji Aor litsü nung lir aser Mangkolemba District-jia Aor litsü nungsa asütsü. Ajiser, küm shia Ao lima nung District ka atema budget/sanction/fund lemozüka aliba....District ana atema lemozüksü. Iba budget/sanction/fund lemozüka jagi asen Ao lima-sa renloktsü masü no ? Tang Aotsür Aor yimdak alirtem Mokokchung District aser town kisung nung; pei züsentetba aonsotsü, sungjang-lijang aser pei inyaktetba ola-angla aser yongsen mapa (Handloom and Handicraft) shishia aser yoka aliba....District aser Town ana nung shishitsü aser ayoktsü....Ibajagi asen Aotsür Aor-sa rongsenketzüng nung jenjang tajungba ajungkettsü masü no ?

Tang Kohima aser Chumoukedima District anaprongla ya Angami nunger litsü nung lir. Ashiko, mapang kabo Medziphema Sub-Division ya-a District akümtsü akok....Iba-jia Angami nunger litsü nungsa asütsü. Surabangla, Angami nunger litsü nung District asem asütsü. Tang Zünheboto aser Niuland District anaprongla ya Sema nunger litsü nung lir. Ashiko, ano mapang kabo Pughoboto, Kùhuboto, Dhansiripar....item Sub-Divisions ya-a District akümtsü akok....Item ajakji Sema nunger litsü nung asütsü. Surabangla, Sema nunger litsü nungpo District pongu asütsü. Anungji sorkar budget/sanction Angami lima aser Sema lima nung teimba lemozüksü. Aji oda, tanga sorkari Mokokchung Disdrikt yapo tera senzüka yutsür amai nutsüng-nuburtemibo tera nemjema bilemer. Aji oda, tangar kin litsü nung District tali küma aoba nungji tenukmeremba olen nung jembir masü....Saka mapa tajungbo tangar nungia ajizüka inyaksüla. Aji oda, Ao lima nung District tasen talila küma aoba agi asen Aor tsüngda telemsa adoktsü amai kari angateta aser bilema lira ajibo melenshinung tajungba asütsü. Kokrabangla, tang aliba Mokokchung District yagi District asembosa küma aotsü külemi longjemer lenmang bushitsüla.

Kanga tesasatsüka, asen Aor ya tangar kin ama telongjem mali; kati ka tsüngda nung majinutepba aser tenukmeremtepba agi sunger; kati ka jenjang raksatsütsü merangba aser kati ka jenjang junga aliba attsüzüksü merangba; iba amala jakla-yimya keta aliba yagi asenok tejakleni aotsü melena tesuleni talangka atsüngzüka oadokogo. Talisa, Political Field nung aser lenla aika nung tangar sulen tanidaker kümogo. Taoba ita nung Nagaland Public Service Commission (NPSC) General Exam. Result adokba nung....EAC aser DSP ama Cadre Post nung Aotsür Aor-bo ka danga madenba nung-to....Tanü asen Aotsür Aor iba jenjang nungji lir ta aikati nguogo aser angateter alitsü sudi. Hau-niii....Technial Exam. balala nungpo asen Aotsür Aor-a aika-sa adoker....Saka Government Department shia nung tokolak aser tazünpur menden tonga atutsüabajibo EAC aser DSP Cadre Post nung adokertemji teimba asütsü sudi. Ajisuaka, kanga tesasatsüka; asen Aotsür Aor iba Post ana nungji ka danga madenba-to angudang; asen Aotsür Aor tarutsü nukla aser jenjang makai küma odagi.... ta kanga nemjema bilemer. Anungji asen Aotsür Aor lanurtem khen züngiangshir tarutsü nukla aser mangdang ulushitsü ajungshir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Asia tesem balala nungi Khristantemi Nepal atema sarasademtsü



September 15, 2026 nü Nepal atema online ajanga sarasademtsüba sentong nung shilem agirtem kar noksa nung angur.

September 16, 2026: September 15, 2026 nü Asia tesem balala nungi Khristantemi online ajanga Nepal atema sarasademtsüba sentong ka agiogo.

Taoba ita Nepal nung ajungbena tzümetzung lendong tuluka atalok aser iba lendong nungji nisung meyirjang ka dak tali asü aser meyirjang aika samaogo.

Federation of Asian Bishops' Conferences Office of Human Development, Radio Veritas Asia aser Laudato Si' Movement Asia-Pacific-i longjemer ayongzükba sentong nung shilem agirtemi Nepal atema mangyimtsüba den

külemi iba linük atema sarasademtsüogo.

Nepal yimtiba, Kathmandu nung aliba St. Xavier school nung tongti, Boby Joseph Thadathil-i, iba mapang ya temeim sayutsü aser tenzütsü mapang ka lir, ta ashi.

Putir Thadathil-isa, iba lendong ajanga kiojen, schools, health services, tzü supply aser terenlok mapa aika raksatsüogo, ta metetdaksü.

Paisa iba lendong ajanga takoksa angurtem taküm tanaben yangershitsü atema maneni yariang ta mepishia metetdaksü.

Caritas Nepal nung director, Cecilia Shrestha, anentsüh aser

tzümetzung lendong ajanga kanga sensakertem tamajungba kongshir, ta metetdaksü.

FABC Office of Human Development nung chairman, Bishop Allwyn D'Silva-i, Ezekiel 47 nung shia aliba taküm tzü aser Tsüngremi yangluba alima anepalutsü sendaktepa jembu.

Paisa, "Nepal lendong nungi tansütsü lesson agir asenoki alima anepaludi," ta ashi.

Khristantem den külemi Bah'ik, Buddhist, Islam aser Kirat nungia lenirtemi iba lendong nung asürtem, iba lendong agi kongshirtem aser teyari agütsürtem atema sarasademtsüba nung shilem agiogo.

Muslim nunger kati Khristan jala ana rongseta südaktsütsü merang



Amina aser Shamila

September 15, 2026: September 06, 2026 ayaterm mapang nung Uganda nung Kasese district kübok Kibenge nung Muslim nunger kati jala Khristan ana mi agi rongseta südaktsütsü atema kidang mi senokja liasü.

Muhamad-i par jala ana-Amina aser Shamila na ki telung nung amoi oa lia kidang petrol totzü shiloktsür mi senokja liasü.

August 26, 2026 nü jala ana jagi Khristan yimsü agizükba sülen tebui jala ana dangji, 'nenati Islam yimsü sendokogo, anungji ni Isamic ozüing nung

aliba ama inyaktsü', ta jelia tena amokmerener liasü.

Tebui kidang mi senoktsüba sülen jala anaji amoi oa aliba nungi saak.

Amina-i, "Kidang mokozi adokbaji küinati angu aser küna taküm lendong nung lir ta küinati meteta liasü. Küinati lungru kar agienba sülen ki telung nungi adoka jena otet," ta metetdaksü.

Amina-i, "Mi agi küna tejenokdak ajak rongdokogo saka küna tamang aser Yisu Khrista dang teimlabo mesamatsütet," ta metetdaksü.

Yangji aliba Khristantemi

iba tatalokbaji sashia aitsüogo. Kidang mi senoktsüba Uganda nung ozüing alema inyakba mapa ka lir, ta parnoki metetdaksü.

Khristantemisa, tetsürta ana tebuji pua ken o akatsüla, ta takhangba agütsü.

Yimdak tekolaki, "Tena kümzükbaba atema ni Tsüngrem nem tenügang agütsür. Iba dak alia kiyong nung aliba Khristantemi tai maket Khristan ana kümzükbaba atema pelar. Yimsü nung ajemdaker nisung tepsettsü merangbaji onoki sashia aitsür," ta metetdaksü.

ANOGO ABEN TSÜNGREM DEN

Asüng Kilirtem

- T.Ken 78:1-8

Tarutsü putu asoshi asenok teinyaktsü lir. Ken züluri zülur, "Parnok chirtem dang nungi itemji onoki miima mayutsü, saka Kibuba tenügang, aser pa tashi, aser Pai inyakba sayatenyatem tarutsü putu dang ashitsü"(t.4).

Kechiba asenoki tarutsü putu den Tsüngrem o lemsateptsü? "Aser par tsurabur ama, tashi mangaba aser mazüoktetba putu ka"(t.7). Ibaji tarutsü putu asoshi parnok terünemba lir, kechiaser teimlai tarutsü dak repranger. Yisu Khrista shia aruba ajanga khristantem taküm aliba tamang nung tanaben aso. Asenoki metet asen Kibuba tanaben arutsü aser asenok asen kidang kotaki anir atutsü. Tanu lanur putu nung aikati teimla sen nung, sorkar dak mesüra parnok tashi dak teimla yur lir. Anungji asenok tarutsü putu dang parnok teimla Tsüngrem dak ayutsüba ashiba ajanga asenoki Kibuba temoatsü taruba putu den lemsateper.

Tanabuba, taruba putui Tsüngrem mapatem bilemtettsü asenoki aginer. Pai asenok asoshi inyakba amadoktsü koda temela ! Ajisüaka, asenoki taruba putu nem bilemdaktsütsüla. Shirnoki tesüba amadoker parnoki maneni kasa aibelenji inyaker.

Tatamsa, taruba putui Kibuba ozüngtemji ayutsüsa asenoki Pa mapatem lemsateptsüla. Ken züluri ozüngren taküm indang mejembir. Pai Kibuba dang meima meimba indang jembir. Au putu tasen dang asenoki teinyaktsü ka lir, aser tatishitsü tajung, sayuba ajanga, lemsatepba aser ajungshiba ajanga asenoki asen mapa ataloktsür.

Ne nem Khristan senmang agütsü. Kodang nai taruba putu den Tsüngrem o aser mapa, nai parnok dang senti lesson ka Pai pa nübur taküm inyakba sayur. Tatishitsü tajung ka alitsü merang, koba tarutsü putui Kibuba asoshi alitsü tasü indaktsür.

Maharashtra nung anti-conversion ozüing anema court nung ken o benok

September 16, 2026: Anogo ishika tejaklen ang Maharashtra Freedom of Religion Act, 2026 anema ketdangsertemi independent Arogo Tenla ki ka bendokja liasü.

Anti conversion ozüing ya nija ka temeden, akhümket aser nija ka tashi anema lir, ta shia iba ozüing anema ken o benok.

Arrshi küm 70 Islamic shisashir kati anti conversion ozüing anema ken o benokba ajanga Khristantem nem-a teimla tasen ka agütsüogo.

Meimchir temeden atema inyakertem aser Khristan lenirtemi, iba ozüing ya ajanga nütsüng ajema aliba tamangertem amokmerener, ta ashir.

Tawa Maharashtra tesem balala nung Khristantem anema inyakba kanga bulua akümba mapang ka nung iba state nunga anti conversion ozüing benokogo. India nung iba ozüing benokba state 13bubaji Maharashtra lir.

Iba state nung prayer houses aser house churches anema mita aoba kanga bulua akümba dang masü saka state sorkaria Arogotem aser Khristan mission indang ali aser kiojen ajak audit asütsü tetuyuba agütsüogo.

Arogo nung lenirtemi, Khristantem anema inyakba kanga bulua akümba mapang nung ano tang anti conversion ozüing tasen benokba ya Khristan ministries, healthcare centers aser shisaliok rejutem tashi meiti kümdaktsütsü nükjidong nung lir, ta metetdaksü.

Osang angazükba agi, August 21 nüa Maharashtra nung anti conversion ozüing anema ken o benoka liasü ajisüaka Bombay High Court Nagpur Bench-i magizük.

AO OSHI ANGAZÜKDAK:**TANÜ ANGAZÜKTSÜBA OJANG****Busapulem**

(n) aoksaa ola tashii adoka asatepba (commotion)

* Lendong mapang kangabo busapulem masütsüla.

Chilayila

(n) molamoshia (abundance)

* Tsüngremi asenok ya chilayilaa moatsür.



Tir Yimyim

OLONG PAITEP # 7652

1			2			3			4
			5		6		7		
8									
			9						
	10								
							11		12
			13				14		
15						16			

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünösenbongtsü adokdak - (3)

OLONG PAITEP # 7651 TELANGZÜBA**TIPIEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Sükak, 10. Aonung,
11. Dokan, 13. Tinu.

NAI-A YA METETTER

Star Trek fans-i September 10, 2026 Star Trek Day nung otsü tasen ka yangluogo. Nisung 1,188 tashi London nung aliba Science Museum nung adenshi aser nisung 934-i minute ka tema Vulcan salute agütsüba ajanga otsü tasen yangluba Guinness World Records-i kuli agütsüogo.

'Iron Lady of Assam' Sanjukta Parashar-i CoBRA IG inyaker

Guwahati, September 16, 2026 (Agencies): "Iron Lady of Assam" ta ajar senior IPS officer Sanjukta Parashar-i CRPF indang elite CoBRA unit nung Inspector General mapa tenzükogo.

Sanjukta Parashar-i Northeast nung counter-insurgency mapa tajung inyakba atema tetshir aser CRPF indang specialised jungle-warfare force nung lai mezügbuba tetsür tanishir lir.

Parashar ya Assam-Meghalaya cadre nungi 2006-batch IPS officer ka lir. CRPF headquarters-i taoba hopta la IG, CoBRA inyaksü shim aser lai 1996-batch IPS officer Danesh Rana melenzüker.

CoBRA (Commando Battalion for Resolute Action) ya CRPF nung specialised

operational formations rongnung ka lir. CoBRA ya jungle and guerrilla warfare atema tentetba lir.

Chhattisgarh, Jharkhand, Odisha aser Maharashtra nung anti-Maoist operations nung CoBRA kanga amshiogo.

CoBRA commandos-i Naxal teloktem anema intelligence-based jungle warfare aser guerrilla operations takok ngua inyakba atema Ministry of Home Affairs-i tenüsang agütsüogo.

Parashar-i 2008 küm mezüng atema Makum, Assam nung Assistant Commandant inyaka liasü. Iba sülen la Udalguri-i yok aser iba mapang Bodo teloktem aser Bangladesh nungi arurtem tsünga rara adoka liasü.

Lai Assam aser iba sülen Northeast nung counter-

insurgency operations takok ngua inyakba ajanga "Iron Lady of Assam" tenüng jaloktsü.

Parashar-i National Investigation Agency nung Deputy Inspector General ama inyakogo aser idangji terrorism, extremism aser national security dak sendakba ken o tem repranga liasü.

Parashar-i Indraprastha College for Women, Delhi University nung political science azüng aser iba sülen Jawaharlal Nehru University nung International Relations azüng.

Lai MPhil aser PhD renem aser la indang doctoral work ji US foreign policy indang liasü.

Assam-Meghalaya cadre nungi 1991-batch IPS officer, CRPF Director General Gyanendra Pratap Singh-ia taoba nung NIA nung inyakogo.

Arunachal Pradesh teshimtet teloki CPC nung adener

Itanagar, September 16, 2026 (Agencies): Arunachal Pradesh nungi teshimtet telok kati Cape Town, South Africa nung 69th Commonwealth Parliamentary Conference (CPC) nung adener.

Iba mungdang ya Parliament of South Africa aser South Africa Branch of the Commonwealth Parliamentary Association (CPA) külemi yaritepa

ayongzüker.

Arunachal Pradesh Assembly Speaker Tesam Pongte-i anir teshimtet telok nung Deputy Speaker Kardo Nyigyor, Khonsa East MLA Wanglam Sawin aser Lumla MLA Tsering Lhamu nung dena lir. Maneni, Arunachal Pradesh Legislative Assembly Secretary Tadar Meena-a parnok den lir.

Taküm CPC ya ,

"Strengthening International Law and Parliamentary Democracy in a Changing World Order: Commonwealth Leadership" omen nung ajemdaker amunger.

Commonwealth countries 56 nungi parliamentarians aser representatives-i iba mungdang nung adener. Iba mungdang nungsa Commonwealth Parliamentary Association atema elections agütsü.

Assam sorkari district shia nung drug rehab centres lapoktsü

Jorhat, September 16, 2026 (Agencies): Assam sorkari district shia nung government-run drug rehabilitation centres amenoktsü ta Chief Minister Himanta Biswa Sarma-i ashi.

Sorkar tsüngdang private de-addiction centres anema ken o

aika benoka lir. Item facilities nung drug achiba osangtem lir ta CM Sarma-i ashi.

"Onoki private rehab centres jungjunga mita reprangtsü. District shia nung government centres lapoktsü aser kobi melii private rehab

facilities nungdak madoktsü" ta pai ashi.

BRICS Guwahati Declaration on drugs agreement ajanga züngsema aliba linüktem külemi longjemer narcotics anema raraba nung tashi aittsü, ta Sarma-isa ashi.



Niuland district nung Kuhuboto Sub-Division kübok Anato yimtsüng nung tzümetsüng agi kongshir aliba kibong ti nem district administration tenüng nung SDO (Civil), Kuhuboto, Nuhuta Tunyi ajanga September 15, 2026 nü senotsü teyari agüja liasü.

Gaza nung ki ka chirep; nisung 20 asü

Gaza City, Rongjui/September 16 (Agencies): Gaza City nung rara dang raksar aliba ki ka chirepba sülen tetsür aser tanur densema Palestine nunger 20 süogo aser aika sabanga lir.

Palestinian Civil Defence-i Bodhbarnü ashiba agi, trokben tashi atongtepa tur aliba ki ya Mongolbar aonung chirepa sülen tanur pongu densema nisung 20 süogo aser nisung 14 yiruogo.

Video tem ajanga teküzmükertemi ki chireper aliba nungi tanurtem atsütetba nguogo. Tenük kuli agütsürtemi ashiba agi, ki chireper aliba telung nungi tanurtemi teyari meshia ajepba angashia liasü.

Video ka nung tetsür chanu ka taküm atsütetba aser tanurtem densema taküm alirtem aika ki chireper aliba nungi tangula magipoinai adokba sülen parnok ambulance nung anir aoba nguogo.

Gaza civil defence otongdar Mahmoud Basal-i Al Jazeera dang ashiba agi, tasümangtem agitettsü aser samar alirtem bushitsü asoshi civil defence team tem maneni inyaksangshidar. Tang tashi nung Palestine nunger 100 shi

ki chireper aliba nung sabanga lir.

Paisa, ki chireper aliba nung sabanga alirtem tonga aotsü tetsükdaktsü adoker, kechiyong teküzmükertem ket nung hadir tapet mali.

Local media sangdong balala ajanga ashiba agi, taoba mapang Israel-i bomb pokloksüba mapang iba ki dak kongshi aser tera raksar liasü.

Israel-i Gaza amak tenzükba sülen ki meyirejang aika raksatsüogo, aser Israel-i kitem yanglushitsü asoshi osettem belener aotsü memelar.

Palestine nungertem aika refugee centre tem mesüra süki tapet maliba ajanga taolen makai akümba sülen lendong keta aliba kitem nung litepdar, ta Basal-i ashi.

Israel-isa, jananongna mercketttsü aser teküzmükba maparen inyaktsü atema civil defence team temi nüngdakba equipment tulutem iba tesemi bener maitsü atema tenokdangba tesashi agütsür lir.

Hadirtem peria maliba ajanga tang ama ki chireper sabanga alirtem tonga aotsü asoshi teküzmükertemi pei teka agi dang inyaksangshitsüsa akümer.

Office kapoksatsüba atema NKorea dang \$32.5magütsütsü tuyu

Seoul, Rongjui/September 16 (Agencies): 2020 küm North Korea nung office ka poksatsüba atema Seoul nung okadak kati Pyongyang dang sen USD million 32.5 agütsütsü atema tetuyuba agütsüogo. Iba office ya kidanger linük ana tsüngda tesendaktep tajungba kümdaktsütsü nükjidong nung yangluba liasü.

"North-i teraksa adokdaktsüba menoktsü atema South Korea sorkar nem won billion 44.6 agütsütsüla ta iba okadak ya obendang agütsüogo," ta Seoul Central District Court otongdar kati Bodhbarnü AFP news agency dang ashi.

Inter-Korean Liaison Office raksatsüba atema tang ken o benokba ya South Korea sorkari teraksatsüba atema North dang temenok indang indang meshiba mezüngbuba asütsü, ta media sangdong balala ajanga metetdaktsü.

Iba office ya Kaesong Industrial Complex nung yanglu, kong South Korea nunger company temi North Korea nunger mapa inyakertem

anioker inyaksangshia liasü.

Ajisüaka Pyongyang-i 2020 küm iba ki ya poksatsü. South nungi activist temi Pyongyang anema leaflets tem North-i anogo ishika atonga yokba ajanga tensa mejungi akümba sülen iba office ya kecha tagidak maka ta shia poksatsü. South Korea-i ashiba agi, parnoki jenjang tapet agitsü asoshi ken o asadangtsü, ajisüaka mongintemi ashiba agi, Pyongyang-i Kaesong yimti nung iba ki raksatsüba atema temenok magütsütsü akok.

Ken o ya 2023 küm South

Korea lenir Yoon Suk-yeol-i aniba sorkari benok, shirnoki North Korea anema jenjang tesashi agia aruogo.

Office ya 2018 küm September ita lapok. Iba mapang South Korea tir Moon Jae-in North Korea lenir Kim Jong Un den senden tasembuba amentsü atema mao tsüngda iba office lapoka liasü.

Iba office nung linük anaprongla nungi ketdangsür metsütsü inyaka liasü, ajisüaka COVID-19 wara poktetba ajanga 2020 küm January ita inyaksangshia anena liasü.

AFFIDAVIT

I, Miss H AYINLA @ YINSHIRENLA, Daughter of M Hanjichung, aged about 19 Years, resident of H.No-160 Kuthur Village Shamator, Nagaland, do hereby solemnly affirm and declare as follows:

- That I am a citizen of India and an Indigenous inhabitant of Nagaland
- That, in birth certificate, schedule tribe certificate, indigenous certificates and all my other documents my name is entered as H AYINLA.
- That, whereas in my Aadhar card bearing no-3738 5503 3200 my name is entered and re orded as YINSHIRENLA.
- That, this affidavit is made to declare that the names H AYINLA and YINSHIRENLA are my name.
- That, this affidavit is declared so as to rectify my name in my Aadhar Card from YINSHIRENLA to H AYINLA.
- That, henceforth, I shall use my as H AYINLA for all official purposes and references.
- That, I do state and verify that the statements made above are true and correct to the best of my knowledge and nothing is false.

DEPONENT

GOVERNMENT OF NAGALAND DEPARTMENT OF PERSONNEL & ADMINISTRATIVE REFORMS (PERSONNEL 'A' BRANCH)

NO.PAR-A/02/2026-AIS

Dated: Kohima, the 16th Sept 2026

VACANCY CIRCULAR

Applications are hereby invited for induction/selection to the IAS cadre of Nagaland from eligible officers serving under the State Government of Nagaland other than the State Civil Service/State Police Service/State Forest Service and State Judicial Service to fill up 1 (one) post of IAS for the Select List 2025.

Fresh applications along with Service details/Bio-data in the prescribed format and complete ACR/ APARS dossiers and duly recommended by the respective AHoDs should be submitted to the Principal Secretary, Department of Personnel & Administrative Reforms within 7 (seven) days (ie 22.09.2026) from the date of issue of this circular.

Eligibility criteria :

- Officers not belonging to the State Civil Service but serving in connection with the affairs of the State who:
 - is of outstanding merit and ability,
 - holds a gazetted post in a substantive capacity,
 - has completed not less than 8 (eight) years of continuous service under the State Government on the first day of January 2025 in a post which has been declared equivalent to the post of Deputy Collector in the State Civil Service.
- The upper age limit will be 56 years as on 01.01.2025 i.e. the date of determination of Select List 2025.
- Officers with adverse remarks in the APAR or pending disciplinary/criminal cases shall not be recommended.
- Only officers recruited through the Nagaland Public Service Commission or a duly constituted recruitment body/agency as provided for in the service rules, after open advertisement, may apply.
- This vacancy circular is subject to the approval of the Cabinet.

Sd/- SENTIYANGER IMCHEN, IAS
Chief Secretary to the Govt. of Nagaland

Annexure 3.4 (Non-SCS)

Bio-Data of Non SCS Officers

- Name of Officer :
- Date of Birth :
- Educational Qualifications :
- Whether belongs to SC/ST/OBC :
- Date of Confirmation in Gazetted posts :
- Present Post held :
- (i) Date of appointment to the post which has been declared equivalent to the post of Dy Collector in the State Civil Service :
(ii) Name of the Post :
(iii) Whether holding that post substantively and the date since when :
8. Details of Gazetted posts held :

S.No.	Name of the Posts held	Category of posts	Period	Scale of Pay	Duties (In Brief).

- Achievements In Brief (including publications if any) :
- Trainings undergone :

Iran rara tembangtsü atema House nung asemben buba vote agitep

Washington, Rongjui/Sept. 16 (Agencies): Asemben buba Iran rara tembangtsü atema US House nung vote agitepogo aser congress temelaba makai mitkar mapa maneni inyaktsü Tir Donald Trump indang tashi soita ayutsüsa 'war powers resolution' agizüka liasü.

Mongulbarnü menur vote agitepba nung 220-204 agütsü, koba taküm meyi mapang agütsüba den mesükteper liasü, kong Republicans ishika Democrats ajunga den dener rara tembangtsü vote agüja liasü. Taoba mapang anaben vote agia renemba pangzüng ka tir matong, kong Trump-i temetet nokdangtsü liasü.

"Donald Trump-i iba rara ya hopta ishika dang alitsü ta ashiba bilemteter südi?" ta Rep. Seth Moulton, D-Mass., ajanga ashi, shiba Iraq War mapang Marine ka liasü aser iba pangzüng benokba bhukuma liasü.

Congress-i shidakba tasüngtangba tasak asüngdangtsü mapangji tangya lir, kechiaser Constitution-i asenok dang raratsü jangra aliba administration kübok alitsü melen inyaktsü tuyur, ta pai ashi.

House Foreign Affairs Committee mendenpuba, Republican Rep. Brian Mast of Florida-i Iran ya timtem ka ama aliba region nungi Democrats temi koba military resources agienner, ta asüngdanga liasü.

Trump ya tatem maka

raratem anema lir, aser pai ibaji tembanger - Iran nungi küm aika timtem agütsüba, ta Mast-i ashi.

"Parnok ya United States asoshi tanen maka timtem lir. Ojang südaktsütsü," ta Mast-i ashi.

Ibai midterm elections agitsü lia Iran rara atema House nung vote tatembangba alitsü mesüker, kechiaser yimden yimsüsür nübuyimba nung bendanglen rara yagi shilem tulu agir. Trump-i February 28 nü tenzükba rara ya talangka atsür arur aser mapang shia missile tesashi amshia maktepba ajanga region nung ita tenet jungnüa timtem tulu ajurua arur.

Congress amokbangtsü atema electoion agütsü anogo 50 majung lia ozüng yanglurtem pei kidangi oa nübuyim tenzüktsü, kong Democrats-i Republicans ket nungi tashi rakzüktsü meranger.

Rara mechi tongtipang Strait of Hormuz ajanga totzü bener maruteti US nunga totzü jenjang tasakba kuma voters tem mepelai lir.

August 1 tashinung iba rara nung sen \$38 billion dak tema indokogo aser ita shia sen \$2 billion nungi \$3 billion tsüngta indoktsü, ta Congressional Budget Office ajanga Mongulbarnü ashi. Rara mechi inflation ya imlaba dang 0.5 percentage points agi timba nung 2027-i ayaoka aitsü ta budget office-i takzüteda lir.

(Maneni tapak 8 nung...)

Mokokchung nung 14Buba Luke Sasong Volleyball Trophy asayadagi



14Buba Luke Sasong Volleyball Trophy nung tongti tejaoker Hon'Ble Advisor, Youth Resources & Sports, Wb. S.Keoshu Yimkhiung-i asayartem den ajurutepa salem asüdag tangokba noksa nung angur.

Mokokchung, Rongjui/September 16 (TYO) : 14Buba Luke Sasong Volleyball Trophy, Mangmetong Kaketshir Telongjem akhüm nung Luke Sasong Sporting Association-i ayongzüka Multi-Purpose Indoor Stadium Mokokchung nungi tenzüka kadadagi.

Iba tetoktepba Rongjui 18 nü tembangtsü aser tetoktepba nung team 8 lir aser item team-temji MH-10 Kohima, Ever Green Club, Ungma, Savage Setters Volleyball club, Chungtia, Twin Brothers, Changtongya Volleyball Association, Pangti Volleyball Team, United Brothers Chakpa, Longsa Sporting Association ta lir.

Tanü iba sentong nung tongti tejaoker Hon'Ble Advisor, Youth Resources & Sports,

Govt. of Nagaland, Wb.S.Keoshu Yimkhiung-i jembidang Naga nungeri saisabong ya tsüngküm mongpo ka arudang dang asayar aser iba tsüngkümji süirbo odang yutsür aser ibaji mapang endokba aser rongsen endokba dang asür, iba yongji asen Naga nunger tangar den metoktepteter ta ashi.

Advisor-isa Naga nunger asayaba nung ajungkettsü asoshi sentong kanga junga asadang renemtsüla, asayamong ka akadang teti arishi küm telemsa alitsü aser aser talisa küm 18 aser 20 tekübokpur asayadaktsü nung itemji tain küma aodang junga asayateta tangar den tokteptetsüsa renemteteter alitsü, aser iba nungji tarutsü asoshi teimla angur ta lemsatetep.

Tanü tensa joko sorkar mapa angutsü kanga tasak küma odagi, anungji saisabongertemi pei-i jangraba asaya nung temulung agüja iba asayaji ajanga na sorkar mapa ngutettsü lenmang sadema lir ta asayartem ajungshia Advisor Keoshu-isa jemb.

Sentong nung Tsüngrem lenisüba jazüka Mission Co-ordinator, MTBA Imtiwala Imchen ajanga sarasadem aser Mangmetong Kaketshir Telongjem Tir Sb.Tsüngsanger ajanga tarur pela agizüka jemb, Atsüla Pongen-i ken tajung ka aten aser Technical Committee Convenor Lendilong ketdangsüba nung tenangzüka agiba den Dr.Moalemla Imchen aser Nichet Jamir ketdangsüba nung sentong agia liasü.

State Level Kohima Half Marathon Oct 5 nü asemtsü

Dimapur, Rongjui/September 16 (TYO): 78 Battalion, Central Reserve Police Force (CRPF)-i ayongzüka October 5 nü Indira Gandhi Stadium, Kohima nung State Level Kohima Half Marathon ka asemtsü. Iba asemtepba ya Sports Authority of India (SAI) den longjemer "SPANDAN - Sports for Peace and Development Across Nation" kübok ayongzüka asayatsü.

Iba asayamung ya saisabong ajanga fitness, telongjem, yimjung, lokti nung tesunep ajungkettsü aser lokti nem shilem agidaktsütsü nükjidong nung ayongzükgogo. Iba ajanga Nagaland kübok tesem balala nungi asayartem longjemer asayatsü asoshi sabang tajung ka agütsür.

Asayamung ya kümsük balala shilem asem küma lemsar

asayatsü. Telemsa yamai alitsü:

Category-1: 18 years to below 30 years- Male & Female, distance: 21 KM

Category-2: 30 years to below 45 years- Male & Female, distance:21 KM

Category-3: 45 years and above- Male & Female, distance:10 KM

Asayamung ayongertemi category ajak nung tetsür aser tebur naprongla asemtepba nung 10th position tashi senpet agütsütsü sangdonggogo.

Sentep yamai alitsü:
1st Prize : Rs. 30,000/-
2nd Prize : Rs. 20,000/-
3rd Prize : Rs. 15,000/-
4th Prize : Rs. 10,000/-
5th - 10th Prize: Rs. 5,000/- each.

Sentep ya category ajak nung tetsür aser tebur naprongla nem kasasa agütsütsü, aser iba tetezü senpet 60 agütsütsü, koba

sen lakh 6.30 asütsü.

Iba marathon ya "Run for Fitness | Run for Unity | Run for Peace" omen nung ajemdaker asemtsü.

78 Bn CRPF-i, Nagaland kübok tesem balala nungi nüburtem aser talisa, lanurtem, asayartem, kaketshirtem dang iba asemtepba nung takok tashi shilem agütsü ayongzükgogo.

Asaya nung shilem agütsü atema züngoksemttsü asoshi mapang lapoktsüoggo. Asayartemi publicity material nung agüja aliba QR code scan süa züngoksemttsü mesüra online registration link ajanga züngoksemttsü.

Tenüng züngoksemttsü atema iba link: <https://forms.gle/gx2URdzW4epENXxM7> semdangtetsü mesüra iba number: 9863190181 den tongteprateptetsü, ta kasa sangdong ajanga metetdaktsü.

Messi Argentina team nungi ano khen asayatsü

Rongjui/September 16,2026 (Agencies): October 6 nü Buenos Aires nung Benin den asayatsü aliba Argentina squad nung Lionel Messi-a densema lir, koba pa asoshi linük team nungi tatembangbuba asaya asütsü.

Arishi küm 39 tain Messi-i August ita pa national team nungi ojang dang asayatsü ta sangdonger liasü.


International jenjang nung pai takok angubatem rongnung 2022 FIFA World aser 2021 o 2024 küm Copa America akokba densema lir.

Argentine FA tir Claudio Tapia-i ashiba agi, iba asaya ya Argentina captain nem tetushi agütsütsü asoshi mejeta sentong yangluba lir.

"October 6 nü Argentina nung pai langa aliba ama tatembangbuba tetushi agütsütsü atema onok indang captain, Lionel Andres Messi jaoktsü atema telemtetba agiogo," ta Tapia-i ashi.

Iba asaya ya River Plate indang Estadio Monumental nung asayatsü, kong fan 85,000-i shilem agitettsü. Tapia-isa, 2022 küm World Cup akokba Argentina squad nungi asayar ajak iba sentong nung shilem agütsü jaokgogo.

Messi tatemsa masaya



tsüngda Argentina team September 30 nü Cordoba nung Bolivia den asayatsü aser October 3 nü Buenos Aires nung Burkina Faso den asayatsü. Bolivia den asayatsü aliba ya World Cup final sülen Argentina asoshi mezüngbuba asaya asütsü.

Messi Benin den asayatsü atema shimba tetezü pa linük tenüng nungi 208benbuba asayatsü. Pa ya Argentina team nungi timbaben asayaba aser goal timtiba idaktsüba asayar lir. Pai linük asoshi goal 125 idaktsür lir.

Taoba ita tebu Jorge asüba sülen Messi-i international football asaya nungi anisüngzüksü atema telemtetba agia liasü.

Club jenjang nung Messi maneni Major League Soccer club Inter Miami nungi asayadar. Pai 2028 küm tashi asayatsü atema tenangzüktepba yanglur lir.

BENDANGLI OSANG : Tapak 7 nungi...

Iran rara tembangtsü atema...

Trump-i White House kümsük tanabuba atema takok angudang bendanger rara nung US medendaktsütsü, ta nangzüka lir aser pai Iran anema inyakba yagi House aser Senate amokbanga aliba Republican Party tem tebilemttsü akar.

America nunger timbai Iran nung rara ya raratsü malang ta ashir, ta July ita AP-NORC poll nung shia liasü.

Taoba mapang vote agitepba nung Republican züngsem pezü-i Iran nung rara anentsü atema vote agüja liasü, saka Mongulbarnü war powers vote nung tenet akum, aser yangji Iowa nungi Rep. Zachary Nunn aser Rep. Mariannette Miller-Meeks aser South Carolina nungi retiring Rep. Nancy Mace dena liasü.

Democrats ajunga den külemi war powers resolution bhukuma vote agütsür nungya GOP Reps. Tom Barrett (Michigan), Warren Davidson (Ohio), Brian Fitzpatrick (Pennsylvania) aser Rep. Thomas Massie (Kentucky)

nungertema dena liasü.

Congress-i aiben Iran anema raraba yimya melenshitsü merangogo, saka Trump administration indang mitkar inyakyim azüoktsü merangba ya tir-i nokdangtet mesüra veto agütsütet tashi talangka alitsü.

House-i mezüng war powers resolution ya June ita agizüka liasü aser iba sülen ano July nunga ka agizük aser ajak ya Iran nung US inyakyim soütsü asoshi lir. Senate nunga ter ben buba merangba nung rara tembangtsü war powers resolution ka agizüka liasü, saka Trump-i arütsüba sülen tasüngji GOP senators temi melenshitsü.

Constitution-i Congress nem rara sangdongtsü tashi agütsür, aser ano tir ya commander in chief ama mitkar inyakyim kar nung shilem agütsü tashi agütsür. Vietnam rara sülen yangluba War Powers Act yagi tir indang tashi nung mapang tali tejangja agüja anogo 60 mesüra 90 sülen maneni raratsü atema congress temelaba nüngdaker.

BILEMDANGANG

"Temeim agi talangka aremzüker."